

یوہ آکا شوانی جموں ہے عبید الرحمن تیں خبر سٹو۔

Rev PM Russia

وزیر اعظم نریندر مو دی اج کزان مانہ منعقد ہون آلا 16 واں بریکس اجلاس مانہ شرکت واسطے روس کا 2 روزہ دورہ ور روانہ ہو گیا ہیں۔ برازیل، روس، بھارت، چین تے جنوبی افریقہ ملکاں غو یوہ اجلاس کزان مانہ منعقد ہو رہیو ہے۔ اور اس غو موضوع ”عالمی ترقی تے حفاظت واسطے کثیر جہتی رشتاں نانہ مضبوط“ بنانو رکھیو گیو ہے۔ کزان مانہ آکاشوانی غا نمائندہ نال گل بات کرتاں واں روس مانہ بھارت غا سفیر ونے کمار نے کہیو کہ یوہ اجلاس عالمی معاملات ور گل بات کرن واسطے کئی لیڈراں نانہ موقع فرام کرے گو اور بریکس ممالک غی طرفوں شروع کیا گیا اقدامات ور وی تبادلہ خیال کیو جائے گو۔ موصوف نے کہیو کہ وزیر اعظم نریندر مو دی روس غا صدر ولا دی میر پوتن نال سفا رتی سطح غی ملاقات وی کریں گا۔ نوی دہلی مانہ وزیر اعظم غا اس دورہ بارے ذرائع ابلاغ نال گل بات کرتاں واں خارجہ سیکریٹری وکرم مصری نے کہیو کہ بھارت بریکس غا بنیاد گزار ممالک مانہ شامل ہے اور ملک اس طرز غا اجلاس مانہ چایا جان آلا اقدامات یاہ دیگر معاملات مانہ اہم کردار ادا کرے۔

CM Omar

جموں کشمیر غا وزیر اعلیٰ عمر عبداللہ نے گزشتہ روز کہیو ہے کہ وے جموں کشمیر غی عوام واسطے امن تے ترقی نانہ یقینی بناویں گا اور ذاتی مفاد واسطے انتشار پھیلان آلاں ور لگام کسی جائے گی۔ سرینگر مانہ ذرائع ابلاغ نال گل بات غے دوران وزیر اعلیٰ نے گگن گیر گا ندریل مانہ ہوا دہشت گرد حملہ ور افسوس غو اظہار کرتاں واں کہیو کہ معصوم، بے گناہ افراد غے خلاف دہشت گرداں غا استعمال نال کچھ حاصل نہیں ہو سکتو۔ اُن نے کہیو کہ اس طرز غا معاملات ہم گزشتہ 35 بہراں تیں دیکھ رہیا ہاں اور اس نال جموں کشمیر مانہ کوئی تبدیلی نہیں آئی۔ موصوف نے حفاظتی صورتحال نانہ مزید موثر بنان غی وی گل کی تا نچے ترقی غا اس سفر مانہ کوئی رکاوٹ پیش نہ آوے۔

LG Jammu

لیفٹنٹ گو رنر منوج سنہا نے گزشتہ روز جموں مانہ ششی ابرول غا کہر غو دورو کر غے اُن غا کُنبہ نال تعزیت غو اظہار کیو۔ گگن گیر گا ندریل مانہ ہوا دہشت گرد حملہ مانہ ہلاک ہوا 7 افراد مانہ ششی ابرول وی شامل تھا۔ لیفٹنٹ گو رنر نے متاثرہ کُنبہ نانہ ہر طرز غی مدد غی یقین دہانی کرائی ہے اور کہیو کہ اس حملہ مانہ ملوث دہشت گرداں نانہ جلد ہی قرارو جواب دتو جائے گو۔ اُن نے مزید کہیو کہ کُنبہ غی اس گھڑی مانہ پوری قوم متاثرہ کُنبہ غے نال ہے اور سرکار ششی ابرال غی اولاد غی تعلیم، ملازمت تے دیگر فلاحی کم کاج نانہ خود دیکھے گی۔ گزشتہ روز دیر شام ویلے ششی ابرول غی لاش اُن غی رہائش گاہ تلاب تلو پہنچائی گئی۔ اج اُن غی آخری رسومات ادا کی جائے گی۔

JK ADGP

اے ڈی جی پی جموں آنند جین نے گزشتہ روز کہیو ہے کہ جموں کشمیر پولیس پوری طاقت نال ہر طرح غی للکار غو سامنو کرن واسطے تیار ہے۔ آکاشوانی جموں غا نمائندہ نے خبر دتی ہے کہ موصوف غو یوہ بیان گاندربل مانہ ہوا دہشت گرد حملہ تیں بعد سامنے آيو ہے، جس مانہ 1 ڈاکٹر تے 6 دیگر مزدور دہشت گرداں نے گولی مار غے ہلاک کر دتا تھا۔ سرینگر لہپہ شاہراہ ور تعمیر ہو رہیا اک تئل ور کم کاج کر رہیا ان افراد نانہ دہشت گرداں نے اتواریں اپنو نشانو بنایو تھو۔ اے ڈی جی پی موصوف نے کہیو کہ اس طرز غی للکاراں نال نیڑن تے قانونی ضابطاں غی صورتحال نانہ بحال رکھن تے تشدد غا واقعات ور قابو پان خاطر پولیس غا دستہ ہر وقت تیار ہیں۔

Oath Ceremony

جموں کشمیر قانون ساز اسمبلی واسطے نواں منتخب ہوا وزیر اعلیٰ عمر عبداللہ نے 85 دیگر اسمبلی ممبراں غے طو ر حلف چاہو ہے۔ عارضی طور ور منتخب ہوا اسپیکر مبارک گل نے تمام ممبراں نانہ حلف دایو۔ وزیر اعلیٰ عمر عبداللہ نے کشمیری زبان مانہ حلف لی، اور کشتواڑ تیں بی جے پی ایم ایل اے شگن پر یہار نے سنسکرت زبان مانہ حلف لی۔ اپنا خطاب مانہ اسپیکر مبارک گل نے منتخب ہوا تمام ممبراں نانہ خوش آمدید کہیو اور خوشی غو اظہار کرتاں واں کہیو کہ تقریباً 6 سال بعد اسمبلی مانہ اس طرح غی رونق دیکھی گئی ہے، اور اجلاس منعقد ہوئے۔ اُن نے کہیو کہ تمام ممبراں نانہ عوام غی فلاح و بہبود خاطر مل جل غے کم کرن غی ضرورت ہے۔ موصوف نے اعلان کیو ہے کہ وزیر اعلیٰ عمر عبداللہ نے بڈگام اسمبلی نشست نانہ چھوڑ دتو ہے اور گاندربل اسمبلی نشست ور وے بطور ایم ایل اے کم کریں گا۔

Prez Water Award

صدر جمہو ریہ درویدی مُرمو اج نوی دہلی مانہہ 5 واں قومی پانی انعامات 2023 تقریب مانہہ انعامات تقسیم کریں گی۔ مرکزی جل شکتی وزارت نے 9 زمران مانہہ 38 انعامات غو اعلان کیو ہے۔ جن مانہہ بہترین ریا ست، بہترین ضلعو، بہترین گراں پنچایت، بہترین بلدیا تی مرکز تے بہترین سول سو سائٹی جیسا زمران غا انعامات رکھیا گیا ہیں۔ آکاشوانی غا نمائندہ نے خبر دتی ہے کہ بہترین ریا ست غا طور و پھلو انعام ریا ست آڑیسہ نانہہ دتو جا نے گو۔ جد کہ دوجو انعام اُتر پردیش اور گجرات تے پٹوچری نانہہ تیجو انعام حاصل وے گو۔

Hajj 2025

بھارتیہ حج کمیٹی نے حج 2025 واسطے جمع کرائی جان آلی رقومات غی آخری تا ریخ مانہہ توسیع کر دتی ہے۔ اُن نے یاہ تا ریخ 21 اکتوبر تیں بدھا غے 31 اکتوبر کر دتی گئی ہے۔ اور منتخب عازمین حج 5 نومبر 2024 تک اپنا دستاویز جمع کراسکیں۔ یوہ فیصلو ریاستی حج کمیٹی غی عرضی تیں بعد لیو گیو ہے۔ جس مانہہ کمیٹی نے رقومات جمع کران غی آخری تا ریخ مانہہ توسیع غی مانگ کی تھی۔

Dy CM Condole

جموں کشمیر غا نائب وزیر اعلیٰ سریندر چودھری نے تھنہ منڈی درہال اسمبلی حلقہ غا ایم ایل اے مظفر اقبال خان غی والدہ گلشن فریدہ غی وفات ور دکھ تے تعزیت غو اظہا ر کیو ہے۔ اپنا تعزیتی پیغام مانہہ نائب وزیر اعلیٰ نے مرحومہ واسطے دُعا کی اور اُمید ظاہر کی کہ گُنبو اس صدمہ نانہہ برداشت کرن واسطے ہمت تے حوصلہ غو مظاہرو کرے گو۔ ڈائریکٹر سی بی سی جموں کشمیر تے لداخ وزارت برائے اطلا عات ونشریات غلام عباس نے وی ایل اے تھنہ منڈی مظفر اقبال غی والدہ غی وفات ور تعزیت پیش کی ہے۔

اس غے نال بی خبران غو یوہ بلیٹن ختم ہوؤ۔

News Read by:- Abaid-Ur-Rehman

News Editor:- Manoj Kumar

DEO:- Alam Khan

Skilled:- Rajat Paul